

**TEKS UCAPAN**

**YANG BERHORMAT DATUK SERI SAIFUDDIN  
NASUTION ISMAIL**

**MENTERI  
PERDAGANGAN DALAM NEGERI DAN HAL EHWAL  
PENGGUNA**

**MAJLIS MENANDATANGANI MEMORANDUM  
PERSEFAHAMAN ANTARA MyCC DENGAN  
UNIVERSITI UTARA MALAYSIA**

**27 NOVEMBER 2018**

**RAJA AZIZ ADDRUSE AUDITORIUM,  
KUALA LUMPUR**

Bismillahirrahmanirrahim

Assalamualaikum Warahmatullahi Wabarakatuh

## **SALUTASI**

**Yang Arif Abdul Fareed Abdul Gafoor**

Naib Presiden Majlis Peguam Malaysia;

**Yang Berbahagia Dato' Seri Mohd Hishamuddin Md Yunus**

Pengerusi, Suruhanjaya Persaingan Malaysia;

**Yang Berusaha Encik Iskandar Ismail**

Ketua Pegawai Eksekutif, Suruhanjaya Persaingan Malaysia;

**Yang Berbahagia Profesor Dr Ahmad Bashawir Abdul Ghani**

Naib Canselor, Universiti Utara Malaysia;

**Yang Berbahagia Profesor Madya Dr. Zainal Amin Ayub**

Dekan Undang-Undang, Universiti Utara Malaysia;

Pegawai-pegawai Kementerian Perdagangan Dalam Negeri dan Hal Ehwal Pengguna, Suruhanjaya Persaingan Malaysia, Peguam, Tuan-tuan dan Puan-puan.

Selamat Pagi dan Salam Sejahtera,

Terlebih dahulu, izinkan saya mengambil kesempatan ini untuk mengucapkan setinggi-tinggi penghargaan dan tahniah di atas penganjuran majlis yang penuh bermakna ini. Saya berasa amat bertuah berada di sini bagi mewakili Suruhanjaya dan Kementerian dalam menyambut baik kerjasama strategik masa hadapan di antara Suruhanjaya Persaingan Malaysia dan Institusi-institusi Pengajian Tinggi.

Tuan-tuan dan puan-puan,

Seperti yang kita sedia maklum, Suruhanjaya ini telah ditubuhkan pada 1 April 2011. Semenjak 7 tahun penubuhannya, Suruhanjaya telah berjaya mengharungi pelbagai cabaran dalam memperkenalkan Akta Persaingan 2010 terutamanya bagi memastikan pelaksanaan Akta ini yang berkesan dan berterusan.

Akta Persaingan 2010 telah digubal dengan tujuan untuk melindungi proses persaingan di Malaysia. Persaingan

yang sihat oleh perusahaan akan membolehkan pengguna menikmati harga yang lebih rendah, produk yang lebih berkualiti dan pilihan yang lebih luas bagi sesuatu barangan dan perkhidmatan. Di samping itu, Akta ini juga akan menggalakkan sesuatu perusahaan untuk menjadi lebih cekap dan berinovasi dalam menjalankan urusanniaga perniagaan.

Menurut Akta Suruhanjaya Persaingan 2010, Suruhanjaya mempunyai kuasa untuk menyiasat aduan, mengenakan penalti ke atas perusahaan yang didapati melanggar Akta, menjalankan kajian semula pasaran, mengeluarkan garis panduan, menasihati Menteri atau Kerajaan mengenai perkara yang berkaitan dengan persaingan, mendidik orang ramai, perniagaan serta pihak berkepentingan yang lain mengenai manfaat persaingan.

Tuan-tuan dan puan-puan,

Selaras dengan usaha Suruhanjaya untuk meningkatkan kesedaran generasi muda khususnya para pelajar

berkaitan persaingan dalam perniagaan, peranan Institusi Pengajian Tinggi adalah relevan dan sangat penting dalam memupuk serta menerapkan nilai-nilai persaingan dalam diri setiap pelajar. Sehingga kini, terdapat beberapa universiti di Malaysia yang telah memperkenalkan Undang-Undang Persaingan sebagai subjek elektif dalam sukatan pelajaran berkaitan undang-undang dan perniagaan. Kursus undang-undang persaingan juga turut diperkenalkan di universiti antarabangsa yang lain seperti University of Melbourne Australia dan King's College of London.

Saya berharap akan ada lebih banyak universiti lain yang turut memperkenalkan subjek atau modul Undang-undang Persaingan kepada pelajar di Fakulti Ekonomi, Perniagaan atau Undang-Undang. Para graduan baru dan profesional yang dihasilkan oleh fakulti-fakulti tersebut bakal menjadi pakar undang-undang persaingan pada masa akan datang. Di samping itu, para graduan ini juga dapat membantu Suruhanjaya untuk berkhidmat kepada negara pada masa hadapan demi manfaat

pengguna, perusahaan dan ekonomi secara keseluruhan.

Pada hari yang bermakna ini, Memorandum Persefahaman yang bakal dimeterai ini akan memberi peluang kepada Universiti Utara Malaysia untuk bekerjasama dengan Suruhanjaya dan Kementerian Perdagangan Dalam Negeri dan Hal Ehwal Pengguna mengenai isu-isu yang berkaitan dengan persaingan dan kepenggunaan di Malaysia.

Tuan-tuan dan puan-puan,

Pihak Kementerian sentiasa memberikan perhatian yang sewajarnya kepada pelajar-pelajar universiti melalui pelbagai inisiatif yang bertujuan untuk meningkatkan semangat kepenggunaan dan perusahaan dalam kalangan mahasiswa. Bagi tujuan tersebut, Kementerian telah menubuhkan Gerakan Pengguna Siswa, sebuah Kelab yang ditubuhkan untuk pelajar universiti berkongsi nilai kepenggunaan mereka dengan Kementerian.

Setakat ini, Gerakan Pengguna Siswa telah berjaya mengumpul keahlian lebih daripada 16,000 orang melalui 176 Kelab GPS di seluruh negara. Kementerian juga turut memberi penekanan kepada pelajar di peringkat sekolah rendah melalui penubuhan Kelab Pengguna Sekolah. Kementerian sentiasa meletakkan kepentingan pengguna dan perusahaan sebagai keutamaan paling tinggi dalam semua agenda pembangunan ekonomi domestik di peringkat Kementerian.

Tuan-tuan dan puan-puan,

Suruhanjaya Persaingan Malaysia dan Kementerian berasa amat berbesar hati untuk bekerjasama dan berganding bahu dengan Universiti Utara Malaysia di bawah memorandum yang bakal dimeterai. Hari ini saya juga ingin mengucapkan tahniah kepada Suruhanjaya Persaingan Malaysia atas kejayaan penganjuran kerjasama strategik ini. Kepada semua wakil akademik yang hadir dalam majlis yang bersejarah ini, kehadiran tuan-tuan dan puan-puan adalah satu sokongan yang kukuh terhadap hasrat Suruhanjaya dalam mencapai

objektif yang seperti yang termaktub di dalam Akta Persaingan 2010.

Sebelum saya mengakhiri ucapan, saya berharap agar kita semua berganding bahu dengan Suruhanjaya Persaingan Malaysia demi kebaikan ekonomi negara. Dengan itu, saya mengucapkan terima kasih di atas perhatian tuan-tuan dan puan-puan. Dengan ini, sukacitanya saya merasmikan Majlis Menandatangani Memorandum Persefahaman di antara Suruhanjaya Persaingan Malaysia dengan Universiti Utara Malaysia.

Sekian. Assalamualaikum WBT dan Salam Sejahtera.

**Disediakan Oleh : Suruhanjaya Persaingan  
Malaysia (MyCC)**

**Tarikh : 27 November 2018**